

SCRIPT OF MORNING GOJRI NEWS BULLETIN 30MAY 2026 1015HRS

مارننگ گوجری نیوز بولٹن 30 مئی 2026

یوہ آکاشوانی جموں ہے محمد اکرم تیں خبر سُنو۔

HM BSF

مرکزی وزیر داخلہ امت شاہ نے کہیو ہے کہ حکومت سرحدی حفاظتی دستہ بی۔ایس۔ایف نانہہ مزید نمہ داریاں دین ور غور کررئی ہے۔ تانجے نوی حفاظتی للکاراں گو موثر طریقہ نال نمڑیو جاسکے۔ جناب امت شاہ نے یاه گل گزشتہ روز گجرات غا بھوج مانہہ بی۔ایس۔ایف اہلکاراں تیں مُلاقات غے دوران کہی، جت اُنہاں نے بھارت پاکستان سرحد ور دو اہم نوی سرحدی چوکیاں غو وی افتتاح کیو۔ اُنہاں نے کہیو کہ بی۔ایس۔ایف غا قیام گا 60 سال مانہہ سرحدی حفاظت غا نظام نانہہ مکمل طور ور جدید تے مضبوط بنان غو فیصلو کیو گیو ہے۔ بی۔ایس۔ایف اس وقت پاکستان تے بنگلہ دیش غی سرحداں غی نگرانی کرے۔

IB RESIDENTS

جموں مانہہ بین العوامی سرحد غے قریب رہن آلا لوکاں نے مرکزی وزیر داخلہ امت شاہ غا اس فیصلہ گو خیر مقدم کیو ہے جس غے تحت سرحد تیں 15 کلو میٹر غا علاقہ مانہہ غیر قانونی تعمیرات تے غیر مجاز سرگرمیاں نانہہ ہٹایو جے غو۔ اس قدم غو مقصد حفاظت نانہہ مزید مضبوط بنانو تے غیر قانونی سرگرمیاں ور روک لانو ہے۔ ارنیا، آر۔ایس۔پورہ تے سچیت گڑھ غا رہائشیاں نے اس فیصلہ غی حمایت کرتا وان کہیو کہ سرحدی علاقاں غا غلط استعمال نانہہ روکن تے اُت لوکاں غی حفاظت نانہہ یقینی بنان واسطے سخت اقدامات ضروری ہیں۔

LG DELEGATIONS

بکھ بکھ وفود نے گزشتہ روز لیفٹیننٹ گورنر منوج سنہا تیں مُلاقات کی تے نوجواناں غی فلاح، ترقی تے دیہی علاقاں غی بہتری تیں متعلق امور ور تبادلہ خیال کیو۔ کشمیر سڑک حفاظتی فائڈیشن غا چیئرمین ناصر علی خان غی قیادت مانہہ ایک وفد نے لیفٹیننٹ گورنر نانہہ، نوجوان منشیات غے خلاف قومی کھیڈ میلہ 2026 غا بارا مانہہ آگاہ کیو۔ اس میلہ مانہہ 8 ریاستاں غی ٹیمیاں غے علاوہ نیپال غی دو ٹیم وی حصو لے رئی ہیں۔ اس غو مقصد کھیڈاں تے نوجواناں غی سرگرمیاں غے ذریعے منشیات تیں پاک تے صحت مند معاشرہ غو پیغام دینو ہے۔ اس دوران کانگریس غا سننیر رہنما سریندر سنگھ چنی نے ترال غی ترقی تے مقامی نوجواناں واسطے روزگار غا مواقع تیں متعلق مسائل چایانابارڈ غا نائب منیجنگ ڈائریکٹر گووردھن ایس راوت نے وی لیفٹیننٹ گورنر تیں مُلاقات کی تے دیہی ترقی تیں متعلق امور ور گل بات کی۔

AMARNATH YATRI NIWAS

آئندہ امرناتھ جی یاترہ غے پیش نظر ایس ایس پی جموں جوگیندر سنگھ نے کل بھگوتی نگر کیمپ غو دورو کرغے حفاظتی صورتحال تے دیگر انتظامات غو جائیزو لیو۔ اُنہاں نے کیمپ مانہہ تعینات حفاظتی اہلکاراں گا انتظامات گو معائنو کیو تے افسراں نال گل بات کی۔ جائیزہ اجلاس مانہہ سی۔آرپی۔ایف تے سیول انتظامیہ غا نمائندہ وی موجود تھا۔ اجلاس مانہہ حفاظتی حکمت عملی، ہجوم غا نظم و نسق، ٹریفک غی نگرانی، نگرانی غا نظام تے ہنگامی حالات تیں نمڑن غی تیاریاں ور تبادلہ خیال کیو گیو۔ ایس۔ایس۔پی نے متعلقہ افسراں نانہہ ہدایت کہ تمام انتظامات وقت ور مکمل کریں، بکھ بکھ اداراں غے بشکار بہتر رابطو رکھیں تے یاتریاں نانہہ محفوظ، پُر سکون تے سہولت بھرو ماحول فراہم کریں۔

JK TAEKWONDO

جموں کشمیر اچ تیں سرینگر غا شیر کشمیر انڈور سٹیڈیم مانہ منعقد ہون آلی پہلی بی ٹی ایف انڈیا اوپن انٹرنیشنل تاکواندو، چیمپین شپ 2026 غی میزبانی کرن واسطے تیار ہے۔ جموں کشمیر اسپورٹس کونسل غے زیر اہتمام ہون آلا یہ بین العوامی مقابلہ 2 جون توڑی ریں گا تے مرکزی زیر انتظام مانہ کھیڈاں غا میدان مانہ ایک اہم سنگ میل ثابت وے غواس چیمپین شپ مانہ ملک تے بیرون ملک تیں تائکواندو کھیڈاری شرکت کریں غا، جس سنگ انہاں نانہ اپنی صلاحیتاں گو مظاہرہ کرن تے کھیڈاں مانہ فروغ غو موقع لیے غواسپورٹس کونسل غے مطابق، یہ مقابلہ صرف ایک کھیڈاں غو یونٹ نی بلکہ نوجواناں مانہ منشیات تیں پاک طرز زندگی، نانہ فروغ دینو تے انہاں نانہ کھیڈاں غے ذریعے معاشرے مانہ مثبت کردار ادا کرن غی ترغیب دین گو ایک موثر پلیٹ فارم وی ہے۔

PM MKB

وزیر اعظم نریندر مو دی ملک تے بیرون ملک رہ رہیا بھارتی شہریاں سنگ آئندہ 31 مئی نانہ آکاش وانی ور من کی بات پروگرام مانہ اپنا خیالات سانجہ کریں گایاہ ماہوار ریڈیو پروگرام غی 134 ویں قسط وے غی۔ بوہ پروگرام آکاش وانی، دور درشن، اے آئی آر نیوز ویب سائٹ تے نیوز آن لائن مو بائل ایپ ور نشر تے ٹیلی کاسٹ کیو جائے گو۔ اس توں علاوہ بوہ پروگرام اے آئی آر نیوز، ڈی ڈی نیوز تے وزیر اعظم غا دفتر تے اطلاعات و نشریات غی وزارت غا یوٹیوب چینلاں ور وی براہ راست نشر تے ٹیلی کاسٹ کیو جائے گو۔ آکاش وانی اس پروگرام غی بندی نشریات غے فوراً بعد اس نانہ علا قائی زبانان مانہ وی نشر کرے گو۔

WEATHER

جموں مانہ اچ سویرے ہوئی ہلکی بارش تے ابرالود موسم نے لوکاں نانہ حالیہ گرمی تیں راحت پُجائی ہے۔ صبح سویرے پین آلی ہلکی بوندہ باندی تیں درجہ حرارت مانہ کمی آئی ہے تے شہر بھر مانہ خوشگوار موسم دیکھن نانہ لیو۔ کئی علاقان مانہ بادل چھایا رہیا تے لوکاں نے اس خوش گوار موسم غو خیر مقدم کیو۔ تے محکمہ موسمیات سرینگر نے پیشن گوئی کی ہے کہ اچ جموں کشمیر غا کئی علاقان مانہ ہلکی بارش، گرج چمک، ژالہ باری تے تیز ہواواں چلن غو امکان ہے۔ تاہم 31 مئی تیں 3 جون توڑی موسم زیادہ تر خشک رہن غی توقع ہے۔ اس تیں بعد 4 تے 5 جون نانہ ایک بار پھر کئی مقامات ور گرج چمک غے بارش ہوسکے۔
